

լիսում և այլուր³⁸: Ամենայն հավանականությամբ այս ճամբորդությունը նա կատարել է իր սեփական կալվածները անձամբ տեսնելու և ստուգելու համար: Զաքարիա Ազուլեցու վկայությունից պարզվում է, որ բացի վերոհիշյալ հինգ խասս գյուղերից, նույն շրջանում կային նաև երկու այլ խասսեր, որոնց անունը նա չի հիշատակում³⁹:

Խասս գյուղերի համայնքները, թեև վարչական հարցերում ենթարկվում էին ինչպես Նախիջևանի հաքիմին, այնպես էլ Երևանի բեկլարբեկին, սակայն հարկային պարտավորություններով կապված լինելով անմիջապես խասսե-յե շարիֆի սարքարություն հետ, շատ հարցերում որոշ արտոնություններ էին վայելում, ավելի քիչ էին ենթարկվում տեղական պաշտոնյաների կամայականություններին և շատ հաճախ կարողանում էին իրենց բողոքները տեղ հասցնել⁴⁰:

Թագավորական խասսին պատկանող գյուղերի և այլ ստացվածքների մանրամասն ցուցակները ըստ առանձին վիլայեթների պահվել են խասսե-յե շարիֆի սարքարությունում՝ Սպահանում: Բայց, ամենայն հավանականությամբ, առանձին նահանգների հարկային տեսչություններում ևս դրանք գրանցված են եղել, որպեսզի տարբերվեն դիվանի գյուղերից:

Խասս գյուղերի հարկերը, ինչպես ասվեց, գանձվում էին շահի կալվածների կառավարչության՝ սարքարության կողմից, առանձին «թահսիլդարների» և «մուբաշիրների» միջոցով: Այդ հարկերը իրենց բնույթով և շահերով չէին տարբերվում դիվանի կամ մուբաշիր գյուղերի ուսթաններից գանձվող հարկերից. գյուղացիների սոցիալական վիճակը հիմնականում նույնն էր, ինչ որ մյուս ուսթաններին, այն տարբերությամբ միայն, որ եթե դիվանի գյուղերի ուսթան-հարկը գանձվում էր դիվանի հարկահավաքների միջոցով, ապա այստեղ գյուղական համայնքը պատասխանատու էր անձամբ շահի կողմից նշանակված «խասսեղարներին»: Շահ Սուլեյմանի 1689 թ. մի հրովարտակիրը տեղեկանում ենք, որ այն բանից հետո, երբ Կայսրիկու մահալի խասսեղար և դարուղա (ոստիկանապետ) Քելխոսրով Սագինաշվիլին սպանում է էթեմադ-ուդ-գովլեի վաճառականներին և փախչում Թուրքիա, այդ մահալի խասսեղարությունն ու Կրզըլբիլիսա և Օրթուլի գյուղերի դարուղայությունը տրվում է Օթար բեկ Բրաթեկին. ուսթաններին ու հողագործներին (رعایا و زارعین) կարգադրվում է բոլոր հարկերը վճարել նրան. Օթար բեկ Բրաթեկին պետք է խասսեղարության և դարուղայության կարգով հանցավորներից հանցանքի չափով տուգանք վերցնի և այնպես վարվի ուսթանների հետ, որ բոլորն էլ խաղաղ ու հանգիստ լինեն⁴¹: Սույն հրովարտակիրը պարզ երևում է, որ խասս գյուղերի կամ առանձին շրջանների գլխավոր վերակացուները, որոնք կոչվել են «խասսեղարներ», միաժամանակ վարել են նաև նույն վայրերի դարուղայության պաշտոնը:

Շահ Իսմայիլ Բ-ի օրոք, 1576 թ. օգոստոսի 22-ին գրված մի ընդարձակ կալվածագրից⁴², ըստ որի նոր մահմեդական Մուրադ բեկ անունով մեկը Մեղրի գյուղը վաճառում է նույն գյուղի համայնքին, պարզվում է, որ խասսին

³⁸ Տե՛ս Ե. Ե. Գալստյանի «Պատմություն Հայաստանի», Կ. 11, էջ 228:

³⁹ Տե՛ս Զաքարիա Ազուլեցի, էջ 66 և 69:

⁴⁰ Տե՛ս նույն տեղը, էջ 149—150:

⁴¹ Տե՛ս Մ. Մուրադ, նշվ. աշխ., էջ 26:

⁴² Տե՛ս Մատենադարան, կթղկ. դիվան, թղթ. 1 գ., վավ. 1013: